

La storie dal Friûl e rive pe prime volte su Prime Video

Il docufilm “Marcho. La ultime bandiere” al va indenant a gjoldi di sucès a nivel internazionâl. In curt al sarà disponibil ancje su Apple tv e inte seziôn “Film” di YouTube

No si ferme la corse di “Marcho. La ultime bandiere”. Dopo dal sucès de prime assolude su Rai Storia, il dopli ricognossiment intai USA (il “Best Historical Film” e l’“Award of Excellence Special Mention”), e dopo jessi diventât ancje un satûl in version DVD, Blu Ray e Ultra HD Blu Ray, cumò al rive ancje su [Prime Video](#): la plateforme streaming video on demand di proprietât Amazon e je la plui doprade in Italie, cui siei passe 11 milions di iscripts e il 26% di cuotis. Cun di plui, in curt al sarà a disposizion su Apple tv e su Google Play (inte seziôn Film midiant de plateforme YouTube).

«Al è pardabon impuartant che “Marcho. La ultime bandiere” al sedi su Prime Video. La nestre identitât e la nestre lenghe a rivin di fat suntune plateforme doprade a nivel globâl, e duncje ancje dai furlans tal forest, di là che dai furlans di chenti. Ducj a podaran gjoldi di un prodot cinematografic e documentaristic ecezionâl, dentri di un imprest che al è une suaze internazionâl e che pe prime volte al da acet a une produzion in lenghe furlane. Un risultât significatîf che nus permet di puartâ insom un dai tancj obietîfs là che e je impegnade la ARLeF», al à dit il president de ARLeF, Eros Cisilino.

“Marcho. La ultime bandiere” al è disponibil in streaming in Italie e intai paîs di lenghe inglese. Cui che al à za un abonament al podarà viodi il film daurman. Cui che invezit nol à nissun abonament, nol è escludût: il film si lu pues cjoli a nauli o comprâlu. In cheste maniere, ducj a puedin cjalâlu sielzint la soluzion plui semplice e adate aes propriis esigjencis.

Il docufilm coprodusût de ARLeF e di Arte Video, cul contribût de Friuli Venezia Giulia Film Commission e dal Fonds pal audiovisif dal Friûl-Vignesie Julie, al conte un fat restât platât par 500 agns. La storie e je chê di Marc di Murûs, l’ultin Puartebandiere dal Stât patriarcjâl di Aquilee, l’unic nobil che si è oponût ae invasion di Vignesie, tor dal 1420. E je une storie tornade a lûs dome di pôcs agns, di cuant che intal 1986, intant di un restaur, e je stade cjatade une letare platade fra lis pagjinis di un libri.

La pelicule e je un prodot di grande cualitât ancje graciis ai aprofondiments storics dal professôr Franco Cardini, une vore cognossût in television, e di Alberto Travain, autôr e

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<

curadôr di cetancj saçs su la figure di Marc; Flavia Maria De Vitt, docente di Storie medievâl te Universitât dal Friûl; William Cisilino, diretôr de ARLeF; Gianfranco Ellero, autôr di une vore di monografiis su la storie dal Friûl. Ancje il cast al è di alt profil, tacant dal protagonist, il brâf atôr Paolo Mutti.

Dongje dal fat che il film al è su Prime Video, al è ancje di segnalâ che di pôc Arte Video e à cjapât il ricognossiment "preferred vendor" di Amazon e la certificazion "Preferred Plus" di iTunes/Apple TV, tant che aziende cualificade pe codifiche, localizazion e distribuzion di contignûts video. *«Cun "Marcho. La ultime bandiere" o vin volût fâ cognossi une storie restade platade tal cidin par secui, tornant a dâi dignitât e vôs - al à declarât il regist Marco Fabbro -. Al è un film che al met adun precision storiche e emozion, fevelant di identitât, olse e memorie. Rivâ su Prime Video al è un pas impuartant par condividi cheste storie cuntun public ancjemò plui grant, dongje dal lavôr di distribuzion che e je za daûr a fâ la ORF par dut il mont. Par gno cont, l'obietîf al è simpri stât chest za dal imprin, fâ cognossi cheste storie a nivel internazionâl».*

Udin, ai 30 di Zenâr dal 2026

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / **e-mail: arlef@caltpr.it**

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<